

28 APR 1998

Sukan-Takraw

MALAYSIA ANJUR KEJOHANAN TAKRAW PIALA PERDANA OGOS INI

LANGKAWI, 28 April (Bernama) -- Malaysia akan menghidupkan semula kejohanan sepaktakraw Piala Dunia tahun ini dan menamakannya Piala Perdana sempena nama Perdana Menteri Datuk Seri Dr Mahathir Mohamad.

Sebanyak 22 negara dijangka menyertai kejohanan itu yang akan diadakan di Kuala Lumpur, kata Setiausaha Persatuan Sepak Takraw Malaysia (PSM) Syed Yazid Syed Abdan.

Piala Dunia yang mulanya dikenali sebagai Kejohanan Sepak Takraw MAS/Utusan/RTM akhir sekali diadakan di negara ini pada 1994, katanya.

Syed Yazid berkata Piala Perdana, yang akan dianjurkan mengikut format antara regu, antara lain bertujuan mempopularkan lagi sukan itu pada peringkat antarabangsa di samping memperkenalkan negara ini sebagai perintis sukan sepak takraw.

Katanya, ia juga akan menjadi "pemanas" kepada pasukan negara menyiapkan diri bagi mempertahankan pingat emas pada Sukan Asia di Bangkok Disember ini.

Beliau berkata enam pingat emas menjadi rebutan acara sepak takraw pada Sukan Asia termasuk antara regu lelaki dan wanita serta sepak raga bulatan.

Bagaimanapun, katanya, PSM belum membuat keputusan untuk menghantar pasukan wanita pada sukan itu.

-- BERNAMA

ZI NH ZAB